

四庫全書

集部

欽定四庫全書

顏魯公集卷六

唐 顏真卿 撰

碑

特進行左金吾衛大將軍上柱國清河郡開國公

贈開府儀同三司兼夏州都督康公神道碑

竭誠奉主之謂忠率義忘躬之謂勇忠勇不犯則名登  
于明堂子仕教忠之謂慈戰陣能勇之謂孝孝慈有裕

則道存乎方冊無此四者其惟清河公之族乎公諱阿義屈達于姓康氏柳城人其先世為北蕃十二姓之貴種曾祖頡利部落都督祖染可汗駙馬都知兵馬使父頡利發墨噉可汗衛衙官知部落都督皆有功烈稱於北陲公即衙官之子也正直忠鯁以信行聞為國人所敬長於謀略工騎射其弓十鈞二十三為阿史那頡佚施默噉等九可汗宰相秉心顯一立言無二不吐剛以茹柔必蹈道而履義可汗每有過失未嘗不極言切諫

蕃人中重焉以比國家之丞相宋璟初默啜弟拔悉密時勤嘗擊藥弑可汗公竊而藏之密持示默啜默啜大怒將誅之公以為請但令歸于部落默啜知公至忠繇是益加親信同列四人莫與公比其後公以孤直屢見疑譖遂請退歸可汗察公非罪尋復追為宰相先是毗伽可汗小殺為其大臣梅錄啜所毒小殺覺之盡滅其黨既卒國人立其子伊然可汗無何病卒又立其弟登利可汗華言登利猶可報也其母瞰欲谷之女與其小

臣飮斯達干預國政登利從叔父因左殺右殺東西分  
掌其兵馬登利與其母誘斬右殺盡并其衆左殺懼及  
乃攻殺登利自立為烏蘇米施可汗拔悉密擊敗之脫  
身遁走國中大亂天寶元年公與四男及右殺妻子默  
啜之孫勃德支持勒毗伽可汗女大洛公主伊然可汗  
小妻余塞訥登利可汗女余燭公主及阿布思阿史德  
等部落五千餘帳并駝馬羊牛二十餘萬款塞歸朝朔  
方節度使王斛斯具以上聞秋八月至京師玄宗俾先

謁太廟仍於殿庭引見御花萼樓以宴之仍賦詩用紀  
其事拜公左威衛中郎將屬范陽節度使安祿山潛懷  
異圖庶為已用密奏公充部落都督仍為其先鋒使公  
既不得已僂俛從之四載以破契丹功遷右威衛將軍  
俄拜范陽經略副使五載又破契丹功居多拜左武衛  
大將軍仍充節度副使玄宗嘉之璽書慰勉盈溢篋笥  
十四載冬十一月九日甲子安祿山反范陽公以天子  
有命陷身兇逆舉家見質自拔莫由既至東歸公泣血

顓天次於寤寐欲與諸子逃歸國家為賊邢州刺史康節所告遂被收繫儻奏被誅者二十餘人公之四子各奔于外賊恐衆情不安貫之而後出至德二年闔門二百餘口被安慶緒脅至安陽屬今上為天下兵馬元帥統今尚書今汾陽王郭子儀朔方之師諸節度迴統之衆東收二京公率四子及孫姪等十餘人冒死南奔至汲郡為從者所告家人殲焉二子沒野波英俊挺身行前二子屈須彌施英正持滿殿後沒野波妻阿史那氏

為公控馬登于西山至高平界遇賊蔡希德以精騎三百遮路邀擊沒野波英俊馬奔之先殺四十餘人生擒四人冬十有一月七日投今上行營至馬帝聞而嘉之欲以開府儀同三司處公仍加實封公固辭乃受因以為金吾衛大將軍加特進增封清河郡開國公食邑三

百戶策勲

闕十  
二字

衛大將軍

闕二  
字

卿

闕三  
字

射

闕四  
字

開府儀

同三司太常卿殿前衛前射生兵馬俄加上柱國姑臧縣開國子沒野波雲麾將軍左金吾衛大將軍上柱國



射生散騎常侍驃騎大將軍左武衛大將軍兼鴻臚上  
上柱國殿前射生使清河郡開國公英俊等官秩各有  
差因留公及屈須彌施英正供奉射生以沒野波英俊  
勇冠三軍並令東隨故太尉李光弼于太原後鄴郡瓦  
窰陣官軍與安慶緒相逼王思禮為其所敗賊勢既盛  
太尉與思禮相顧氣索沒野波英俊勃然奮怒遂直抵  
薄河當鋒擊之殺獲二千餘人賊衆方退太尉諸公覩  
而駭之賞雜綵百尺並以轉分麾下無所納三軍欽

美馬沒野波居常謙謹臨事勇銳戰則先鋒前無強敵  
捉生遊奕所向必摧九節度之圍安陽也史思明悉衆  
來救沒野波以十五騎過河逆擊之并馬刺倒者數人  
生擒數十人後擊懷州思明又自來救胄燕之際侵軼柴  
籬沒野波領甲騎三十禦之賊軍王子人一時摧敗真  
卿之棄平原也沒野波為賊騎將緩策不追及聞渡河  
然始奔躡是以得脫於難平原人至今稱之英俊瞪視  
眈眈姿氣雄果發勁矢持大槍巍然萬衆之中左右馳

突無不辟易而退嘗隨太尉討思明于河陽賊驍騎萬餘於中闡城索闔將莫敢應者英俊挺身奔擊之應槍落者二十餘人英俊被槍刺頰貫喉而出擺首而去之猶殺二人而還太尉壯焉遂以從父兄子妻之故天下之言勇者以沒野波英俊兄弟為稱首廣德元年上幸陝州公之諸子皆當扈從公以體貌瓌碩難於舉動方與之死訣沒野波妻為公介馬扶奔華州公慮不免謂左右曰我若為賊所得無累我兒子乎汝曹何不殺我

衆人感懼叫然皆哭遂竭力舁公至于行在上深嗟賞  
之方極尊榮以終宴喜上天不惠以二年青龍甲辰冬  
十有一月二十日甲寅感肺疾薨于上都勝業坊之私  
第春秋七十有五親事左右莫不釐面截耳以哭初凌  
霄之難公實援立漣水之屯公親總統上之反正父子  
從焉帝疇厥功遂有開府儀同三司兼夏州都督之贈  
夫人清河郡太夫人交河石氏左衛中郎將珍之孫左  
金吾衛大將軍三奴之女溫敏淑慎柔明端雅有女師

母儀之德克懋於家不幸遘疾以天寶十五載春三月八日先公而薨永泰元年春二月十日壬申與公合祔于萬年縣之長樂原禮也嗚呼公以沉果之姿抗英威之志降精昂宿炳粹天街忠肅表於生知義勇形于造次屬國家多難淪胥以痛壯一心而來事我君貫四時不改柯易葉義方懇到相携於契闊之中臣節激昂三見於危亡之際天子感焉既受腹心之託禁旅資焉俱列爪牙之地勲庸克茂聲問攸歸叢綵衣於玉帳之前

羅五戟於一門之內不其盛矣昔蕭相國舉宗佐命金  
日碑七葉珥貂望古儔今可謂同德其孤等勿窮孺慕  
靡所寘哀聿求不腆之辭庶播無疆之美銘曰

北方之強歟十有二姓強哉矯部落之雄者康執兵柄  
緬乎眇特進誕生兮實登邦政德不擾遐女滅國兮烏  
蘇不竟愠羣小三濱九死兮舉族致命丹心瞰一門萬  
石兮彰厥誠敬皇恩瞭生為忠臣兮後有餘慶其不夭  
家有孝子兮嚴親翊聖王之爪乃立豐碑兮百代遺詠

鴻名表忠孝之際兮於斯為盛遠圖宵

金紫光祿大夫守太子太傅兼宗正卿贈司空上

柱國隴西郡開國公李公神道碑

昔周武以二公股肱王室然而允釐西土師保萬人者  
其惟召公乎漢室以二傅羽翼儲宮然而亮采東朝儀  
刑百辟者其惟蕭傅乎則九德之師六行之傳親賢既  
美亦何代無其人哉隴西公才為國之垣翰位為天之  
喉舌德為朝之元老行為帝之信臣蓋所謂宗室之間

生士林之傑出者也公諱齊物字道用隴西成紀人自  
若水導其靈源而聖人作高丘峻其曾構而才子生玄  
元為宋帝之先興聖有勤王之舉盛德彌於百祀靈根  
固於千葉太祖景皇帝功高佐魏慶始封唐家崇八柱  
之勲地半三分之業亦猶殷人之祖契周室之宗文公  
即景皇帝之五代孫也鄭王亮之玄孫淮安王神通之  
曾孫淮安王皇朝開府儀同三司尚書左僕射贈司空  
盤石開府介圭錫瑞尚周之晉鄭西漢之間平祖孝銳



鹽州刺史父璟隴州司倉贈弘農太守並清白貽範仁  
賢繼軌連華公族濟美專城公稟乾剛之正性體坤順  
之中德爰自岐嶷特鍾美秀儼然王公之量鬱有台鼎  
之姿固已超等夷而出羣萃矣神龍初起家左右千牛  
備身歷尚輦直長許州司馬華州司兵時方振拔勢已  
飛騰此則江漢之濫觴嵩華之覆簣也丁太夫人憂公  
有至性毀瘠過禮扶杖于家哭不絕聲者累月倚廬于  
墓衣不解帶者終喪天子特降璽書就廬慰勉非常之

澤近古未聞服闋授鴻臚丞除尚輦奉御遷北都軍器  
監事太原為一都之雄鎮軍器掌五庫之禁兵故乾沒  
之贓一徵百萬繕完之利費省巨億少尹嚴挺之連奏  
課最擢拜長安令陸海殷湊五方浩劇公以威禁暴以  
恕用刑邑里之人陶然大化遷將作少匠殿中少監太  
府少卿懷陝二州刺史雖漢之宗室不典三河而周之  
懿親先分二陝惟良之寄實在於公嘗以黃河經砥柱  
之艱有覆舟之患遂奏疏九派鑿三門屬役而堅冰大

合興功而烈火潛熾不愆于素若有神焉人皆以公至誠之所感也又於石獲古銘曰平陸遂以名縣焉玄宗異之賜貂裘一領絹三百疋特加銀青光祿大夫鴻臚卿并公之先隴州府君專城之贈上嘗賜公玉尺一詔曰謂之尺度可以裁成卿實多能故為此賜識者知公必將金玉王度代天之工豈唯從容九列而已拜河南尹仍水陸運使屬左相李公適之尚書裴公寬京兆尹韓公朝宗與公為飛語所中公遂貶竟陵郡太守時陸

羽鴻漸隨師郡中說公下車召人吏口之曰官吏有簠  
簋不修者僧道有戒律不精者百姓有泛駕蹶弛者未  
至之前一無所問而今而後義不相容數年間一境丕  
變熙然若義皇之代矣哀孤重老有隱逸奴道者常騎  
馬於里巷之中親自恤問量移安康即日上道老幼遮  
擁不得發者三辰轉漢陽蘄春其政如一公虛中自牧  
接下愈恭與物盡推誠之心正身無氣燄之忌每上春  
行令大戶閱農輕裹糶糧重煩縣道化流江漢如時雨

馬故郡歷數四課事第一去思之感人到于今稱之天  
寶末徵拜將作監重授鴻臚卿縱壑巨鱗還游舊浦凌  
風勁翮俄返故林時國忠包藏於內

下闕

中散大夫京兆尹漢陽郡太守贈太子少保鮮于

公神道碑銘

公諱向字仲通以字行漁陽人也其先出于殷太師周  
武王封于朝鮮子仲食邑於于因而受氏漢有京兆尹  
褒褒十二世孫康後魏秦州刺史直閣將軍武威郡公

忠於本朝為齊神武所害康玄孫匡贊隋冠氏長義寧  
初通議大夫匡贊生士簡士迪並早孤為叔父隆州刺  
史匡紹所有因家于新政士簡士迪皆魁岸英偉以財  
雄巴蜀招徠賓客名動當時郡中憚之呼為北虜士簡  
生令徵公之父也個儻豪傑多奇畫嘗傾萬金之產周  
濟天下士大夫與妻兄著作郎廣漢嚴從洎殿中侍御  
史何千里俱以氣槩相高不肯仕官竟以壽終天寶九  
年贈遂寧郡太守廣德元年又贈太常卿公少好俠以

鷹犬射獵自娛輕財尚氣果於然諾年二十餘尚未知書太常切責之縣南有離堆山斗入嘉陵江形勝峻絕公乃慷慨發憤屏棄人事鑿石構室以居焉勵精為學至以鍼鈎其臉使不得睡讀書好觀大畧頗工文而不好為之開元二十年年近四十舉鄉貢進士高第二十載調補益州新都尉視事二十日謝病去二十七年長史張宥奏充劍南採訪使宥方謀拔安戎獨與公計畫幕中之事一以咨公司馬章仇兼瓊惡之及代宥

節度乃移郡收公月餘仍釋之俄令攝判使事監越雋  
兵馬復奏充採訪支使盡護叩南軍事首尾二載冒暑  
渡瀘者凡一十八度公秉操堅忮吏人望而畏之改授  
新繁尉充山南西道採訪支使項之雲南蠻動瓊請公  
往以便宜從事公戮其尤害者數人蠻夏惴服山南盜  
賊舊多光火公察其名居悉傾巢穴人至于今賴焉俄  
拜左衛兵曹例遷也瓊以兩道採訪節度使務悉以委  
公無何攝監察御史充劍南山南兩道山澤使遷大理



評事充西山督察使五載戶部侍郎兼御史大夫郭公  
虛已代瓊節制郭以庶務一皆仗公公素懷感激竭誠  
受委故幕府之事無遺諍焉六載拜監察御史公誅羌  
豪董哥羅等數十人以靖八州之地郭公將圖弱水西  
之八國奏公入覲玄宗駭異之即日拜尚書屯田員外  
郎兼侍御史蜀郡司馬劍南行軍司馬既略三河收其  
八國長驅至故洪州與哥舒翰隴右官軍相遇於橫嶺  
鳴鼓而還及郭公云亡慟哭之曰公亡矣吾無為為善

乎初郭公對馭天休每薦公有文武之材堪方面之寄  
至是遂拜公為蜀郡大都督府長史兼御史中丞持節  
充劍南節度副大使公當大任既竭丹誠射討吐蕃摩  
彌城拔之改洪州為保寧都護府塹弱水為蕃漢之界  
收戶數十萬闢土千餘里屬恩敕命召祗赴京師至臨  
臯驛上令中貴人勞問賜甲第一區又錫名馬兼供御  
饌俄拜司農卿將不遠而復十一載拜京兆尹公威名  
素重處理剛嚴公初善執事者後為所忌十二載遂貶

邵陽郡司馬灌園築室以山泉琴酒自娛賦詩百餘篇  
俄移漢陽郡太守下車閉閣唯讀玄經以自適不幸感  
疾以十三載閏十有一月十有五日止于官舍春秋六  
十有二十五載春正月歸葬于新政縣嘉陵江之西岸  
先塋寶應元年追贈衛尉卿廣德元年又贈太子少保  
公凡著坤樞十卷文集十卷並為好事者所傳於戲公  
負不羈之才懷當世之志方及知命始擢一第從宦十  
年超登四岳拔身巴江之下自致青雲之上非夫珪璋

特達聖賢相遭則何以凌厲沈浮若斯之速既而吉凶  
糾纏慶弔相隨天睠排於賊臣雄圖屈於促景有足悲  
矣有子六人仲曰贈左金吾衛郎將昊隨公陷于西二  
河力戰而歿季曰前鄉貢明經晁神清才秀先公而卒  
伯曰壁州刺史昱克篤孝行見稱衣冠公之捐館也萬  
里迎喪沂湍而戰瘞拔險段子章之稱亂也闔門逃賊  
安親而晨夕板輿叔曰萬州刺史晁雅有父風頗精吏  
道肅宗之幸鳳翔也竭誠幕府以佐公家今上之命庶

僚也由華原之政驟登省闈作牧萬州政績尤異有詔遷祕書少監尋又改牧巴州幼曰青城尉晏雅曰成都府參軍景皆保家之主亦著令聞公弟晉字叔明篤厚溫敏少以任俠聞事公以悌稱與朋以信著好讀書而不為章句精吏道而尤擅循良再為法官三秉天憲二登郎署一宰洛陽從其兄之討南蠻也兩軍交戰仗忠信而必使其間佐寧國之如迴紇也絕域奉辭布皇明而皆得要領肅宗褒異擢拜商州刺史無何超遷京兆

尹不十年而兄弟相代論者偉之永泰二年秋八月有  
詔自太子左庶子復拜為邛州刺史兼御史中丞邛南  
八州都防禦觀察等使真卿與公同在御史亡兄國子  
司業允南弟令江陵少尹允臧又與少尹同時臺省既  
接通家之歡載敦世親之好以為徂謝永久所存者微  
歆陵谷雖遷不朽者金石銘功篆美敢墜所聞其詞曰  
洪範垂休系殷封周鮮予身繇派漁陽兮世掌漢厯予  
孫烏奕代有不績洎定襄兮冠氏促齡二孫夙丁隨官

不寧肇定疆兮嘉陵淼淼雲臺矯矯降生京兆為龍光  
兮有武有文剛嚴不羣克懋鴻勲制惟梁兮既靖巴蜀  
既清輦轂日聞啓沃播周行兮結友不終孤我深衷如  
彼飛蟲反予戕兮邵陽典午漢陽紆組孰云心苦坦行  
藏兮天不愁遺哲人其萎反葬江湄怛其傷兮此令有  
裕教忠有素天介景祚熾而昌兮三世尹京二子專城  
一門載榮餘慶彰兮豐碑巍巍盛業暉暉舉世是希與  
天長兮





欽定四庫全書

顏魯公集  
卷六

十一

顏魯公集卷六

欽定四庫全書

集部

顏魯公集卷七至十

詳校官侍郎<sub>臣</sub>李封

檢討<sub>臣</sub>何思鈞覆勘

總校官檢討<sub>臣</sub>何思鈞

校對官編修<sub>臣</sub>李鎔

謄錄監生<sub>臣</sub>謝遴

欽定四庫全書

顏魯公集卷七

唐 顏真卿 撰

碑

郭公廟碑銘

昔申伯翰周降神於維嶽仲父匡晉演慶於筮淮而猶  
見美詩人騰芳史冊豈比夫神明積高之壤百二懸隔  
之都三峰發地而削成九派浮天而噴激炳靈毓粹奕

葉生賢括宇宙而稟和總河山而蘊秀莫與京者其惟郭宗乎其先蓋出周之虢叔虢或為郭因而氏焉代為太原著姓漢有光祿大夫廣德生孟儒為馮翊太守子孫始自太原家焉後轉徙於華山之下故一族今為華州鄭縣人夫其築臺見師瘞子致養家承金穴之貴政有露冕之高或哲或謀或肅或乂皆海有珠而鳥有鳳也閭閻之盛其流益光隋有金州司倉諱履球府君懋其德輝不屑下位克已復禮州邦化焉篤生唐涼州司

法諱昶府君能世其業以伸其道遠近宗之不隕厥問  
生美原縣主簿贈兵部尚書諱通府君清識澈照博綜  
羣言始登王畿鬱有佳稱道悠運促靡及貴仕垂於後  
昆沒而見尊是生我諱敬之府君府君幼而好仁長有  
全德身長八尺二寸行中絜矩聲如洪鍾河目電照虬  
鬚蝟磔進退閒雅望之若神以仲由之闕一字事兼翁歸  
之文武始自涪州錄事參軍轉瓜州司倉雍北府右果  
毅加遊擊將軍申王府典軍金吾府折衝兼左衛長上

原州別駕遷扶州刺史未上除左威衛左郎將兼監牧  
南使渭吉二州刺史侍中牛仙客薨君清節奏授綏州  
遷壽州累加中大夫策勲上柱國以天寶三載春正月  
十日遘疾終于京師常樂坊之私第春秋七十有八乾  
元三年春二月以公之寶胤開府儀同三司司徒兼中  
書令柱國汾陽郡王曰子儀有大勲于王室乃下詔曰  
故中大夫壽州刺史郭敬之果君子之行毓達人之德  
才光文武政美中和生此大賢為我良弼頃以孽胡作

亂黔首罹殃朕於是鬱興神武之師克掃欃槍之氣而子  
儀帥彼勁卒赫然先驅取京洛如拾遺剪凶殘猶振槁  
功存社稷澤潤生人是用寵洽哀榮義申存歿可贈太  
保於戲府君體含弘之素履秉冲邈之高烈言必主於  
忠信行不違於直方清白為吏者之師死生敦交友之  
分端一之操不以夷險槩其懷堅明之姿不以雪霜易  
其令用情不間於踈遠泛愛莫遺於賤貧拳拳服膺終  
始靡二故所居則化所去見思人到於今稱之斯不朽

矣傳曰德盛必百代祀其有後也宜哉恭惟令公先皇之佐命臣也少而美秀長而瓌偉姿性質直天然孝悌寬仁無比騎射絕倫所蒞以清白見稱居常以經濟自命弱冠以邦鄉之賦驟膺將帥之舉四擢高第有聲前朝三為將軍再守大郡累典兵要必聞休績天寶末安祿山反于范陽令公以節度使擁朔方之衆圍高秀巖於雲中破史思明于嘉山先帝之幸朔方赴行在於靈武擊同羅于河曲走崔乾祐于蒲坂今上之為元帥也



首副旄鉞會回紇於扶風摧凶寇于汶水追餘孽於陝  
服長驅河洛弼成睿圖再造生靈克清天步又函夏之  
未乂安天下之未安一年之間區宇大定豈不休哉觀  
其元和降精間氣生德感星辰而作輔應期運以濟時  
忠於國而孝於家威可畏而儀可象盛德繫物寬身厚  
下用人由己從善如流沉謀秘於鬼神精義貫於天地  
推赤誠而許國蹈白刃以率先霆擊于雲雷之初鷹揚  
於廟堂之上大凡二歷鼎司兩升都座四作元帥九年

中書歷事三聖而厥德維懋易相二十而受遇益深蓋  
尅復上都者再戡定東京者一其餘麾城擯邑得雋摧  
鋒亦非遽數之所周也信可謂王國之虓虎生人之蔭  
庥者歟非太保之萬種不孤則何以鍾美若是況於友  
于著睦轡龍虎者十人貽厥有光紆青紫者八九勲庸  
舉集今古莫儔昔奮號尊榮紅粟纔霑於萬石憚家全  
盛朱輪不出於十人繇我觀之事不件矣於乎清廟之  
興所以仁祖考鴻伐之刻亦以垂子孫爰叛制於舊居

將永圖而觀德中堂有血丕構克崇感霜露而怵惕以  
增叙昭穆而敬恭斯在庶乎觀盥顙若既無數于永懷  
入室儼然必有覲乎其位哀榮既極情禮用申仁人之  
所及遠哉孝子之事親終矣豈惟溫溫孔父遠稱饒鼎  
之銘穆穆魯侯獨美龍旂之祀其詞曰

郭之皇祖肇允號土逮於後昆實守左輔徙華陰兮其

一源長流光施于司倉涼州兵部克熾而昌載德深兮

其二篤生太保允懋厥道神之聽之永錫難老式如金

兮其三於穆令公汝陽啓封文經武緯訓徒陟空簡帝

心兮其四含一不二格於天地愷悌君子邦之攸堅昭

德音兮其五芝馥蘭芳羽儀公堂子子孫孫為龍為光

鏘璆琳兮其六乃立新廟肅雍允劬神保是聽孝思孔

炤亶居歆兮其七乃立高碑盛美奚斂日月有既徽猷

永垂映來今兮其八廣德二年歲次甲辰十一月甲午

朔二十一日甲寅建

銀青光祿大夫海濮饒房睦台六州刺史上柱國

汲郡開國公康使君神道碑銘

君諱希鈺字南金其先出於周武王同母少弟衛康叔  
封之後也史記云成王長用事舉康叔為周司寇賜衛  
寶祭器以彰有德封子康伯支庶有食邑于康者遂以  
氏焉代為衛大夫至漢有東郡太守超始居汲郡超之  
裔孫魏強督將軍權權生晉虎賁中郎將秦泰生

關一  
字

太守威威生蘭陵令奮節將軍翼隨晉元帝過江為吳  
興郡丞因居烏程事見山謙之吳興記翼生豫章太守

欽定四庫全書

顏魯公集  
卷七

六

鎮鎮生征虜司馬建武將軍欽信欽信生宋晉熙王兵

曹參軍黯黯生南臺

關一字

高高生齊驃騎大將軍孟真

孟真生梁散騎侍郎僧朗僧朗生陳給事中五兵尚書

宗

關一字

為山陰令子孫始居會稽遂為郡人焉曾祖孝

範江夏王府法曹臨海縣令祖英隋齊

關二字

騎曹江寧

縣令皇朝隨郡王行軍倉曹父國安明經高第以碩學

掌國子監領三館進士教之策授右典戎衛錄事參軍

直崇文館太學助教遷博士白獸門內供奉崇文館學

士贈杭州長史君郎長史府君之叔子也年十四明經

登第補右內率府胄曹應詞藻宏麗舉申科拜祕書省

校書郎轉左金吾衛錄事參軍應博通文史舉高第授

太府寺主簿轉丞又應明於政理舉拜洛州河清令加

朝散大夫

闕一字

州司馬德州長史轉定州屬突厥侵

闕一字

字

君以偏師抗之遷海州刺史

闕一字

功以勅書賜方岳

繡袍一領雜綵二百段下車未幾詔擇政術尤異者察

使奏公恩制褒異遷濮州加銀青光祿大夫累封汲郡

欽定四庫全書

房州志卷七

開國公策勲上柱國轉饒州入為國子司業以

闕二字

貶

房州轉睦州遷台州所至之邦必聞美政開元初入計

至京抗表請致仕玄宗允許仍

闕一字

三年請歸鄉教書

襄美賜衣一襲并雜絲等仍給傳驛至本州冬十月二

十有二日不幸遘疾薨于會稽覺厝里第春秋七十一

夫人陳郡殷氏太子中舍人聞禮之曾孫右清道率令

德之孫

闕一字

州錄事參軍子思之第五女

闕三字

先天二

年封丹陽郡夫人公薨之年歿于東都章善坊私第春



秋六十九嗣子朝散大夫婺州司馬襲汲郡公元

闕一字

會稽縣男元瑾宣州司士京兆府奉先尉會稽縣男元

瑒朝議郎前獲嘉丞元懷等虔以天寶四載

闕一字

月四

日窆于山陰縣籬渚村之先塋卜遠日而葬合焉禮也

嗚呼君負不器之姿包周身之智

闕二字

且惠慤愿而恭

金玉其相敬明其道文意

闕二字

二雅所祇政事優

闕一字

百

闕一字

所則嘗撰自古以來清白吏圖四卷仍自為序

贊以見其志宰相黃門侍郎韋承慶中書舍人馬吉甫

等美而同述焉盛行於世赴海州時君兄德言為右臺

侍御史

闕一字

為偃師令俱以詞學擅名時同請歸鄉拜

掃朝野榮之與狄仁傑岑義韋承慶嗣立元懷景姚元

崇友善至是咸傾朝同賦詩以餞之近代未有此比君

之四代祖至于大父為諸王掾屬者七人歷尚書郎給

事中侍御史者二人君之先君崇文學士府君有文集

十卷注駁文選異義二十卷漢書

闕一字

十卷自述文集

二十卷元昆修書學士顯府君文集十卷撰詞苑麗則

二十卷海藏連珠三十卷累壁十卷姪祕書監集賢院

侍講學士

關一

字一元撰周

關三

累義二十卷秀州長史元

瓌著于錄寶典三十卷姪刑部員外郎璿男美原尉南

華撰代耕心鏡十卷

關六

百二十卷君之先君至南華

四代進士登甲科者七人舉明經者一十三人時

關四

門頗盛美矣君之女曰辨惠蓋屋縣令陝郡長史郃象

鈇妻君之孫台州司今戶參軍

關二

歲而卒汾州司田

參軍真弼德州平昌縣令輔旻崇玄學生曙懷州武陟

尉瞻宣州南陵尉渭鄉貢明經緯綸皆修身踐言敦詩  
悅禮紹承餘訓克稟義方及君告老鄒自然陳光壁間  
邱景陽陶暹送至越州邑子謝務遷僧陸鑒校書郎陳  
齊卿恒為文酒之會論者休焉愜求舊之闕一字崇乞言  
之禮天乎不慙其恨若何大厯十一年元瓌闕九字乞願  
言刻勒懼沒徽猷求無愧之詞垂不朽之事顧惟末學  
曷足當仁銘曰

汲公恂恂德懋

闕四字

多士東南有筠緝熙代業詞章發

身佐軍貌虎典校麒麟三擢崑玉再司

關五字

內驥展河

濬驟貳嘉州錫命斯頻繡寵方岳榮加搢紳六登

關一字

洽膠庠

關六字

華墓表申

關二字

見節文昭友仁懸車告老

衣錦熙神連壁襲懿梓澤齊彬饋醕未濟春濛遽淪朝  
廷惋悼遠近悲辛季子象賢恐懼鬱堙於赫鴻伐千秋  
不泯

遊擊將軍左領軍衛大將軍兼商州刺史武關防  
禦使上柱國歐陽使君神道碑銘

使君諱璵字闕渤海人其先出自帝顓頊高陽氏漢有歐陽伯和伯和孫高高孫地餘並列儒林晉有堅石著名文苑賢達繼軌其來邈乎六代祖僧寶始自渤海徙居長沙五代祖頽陳山陽郡公高祖紇陳開府儀同三司左屯衛大將軍交廣等十九州諸軍事廣州刺史襲山陽郡公功業並著於前史曾伯祖詢皇朝銀青光祿大夫給事中率更令崇賢館學士以詞學德行見重前朝筆法孤標垂名不朽曾祖胤年十七以門子入侍見

賞太宗十八加正議大夫魯王傳奉使和突厥不拜虜  
庭朝廷嘉之回封南海郡公施光二州刺史祖諶洛州  
鞏縣令父機漢州什邡令以休懿傳世著聞于家邦使  
君即什邡之第四子志尚恬曠頗精於詩易春秋尤明  
吏術所居則理開元十八年解褐安西大都護府參軍  
充湯嘉惠節度推勾官外憂去職服闋補北庭大都護  
府戶曹參軍節度使蓋嘉運奏授金滿令仍充營田判  
官以破賊功當遷請回授幼弟孤姪者三人教義稱之

二十九年河西節度使奏授晉昌郡戶曹參軍攝晉昌  
令轉張掖郡張掖令攝司馬知郡事按吏贓罪罪人誣  
訟于使司百姓苗秀康順忠等三十人皆截耳稱冤節  
度使王捶駭焉奏與上下考轉岳州長史時屬荒旱人  
多莩餒君以祿俸職田并率官吏食餓者千餘人凡月  
餘遂多全活劍南節度使楊國忠奏知三峽轉運改衡  
陽郡長史賜緋魚袋天寶末羯胡作亂統江湖之兵先  
至南陽加賜紫金魚袋充魯吳南陽節度副使攝淮南



郡長史充當郡防禦使時南陽為賊所圍諸將選懦莫  
敢先救至德元載君以當郡防禦士至新野芙蓉鄉遇  
賊合戰斬其將犯圍而入吳壯而德之賊圍解加遊擊  
將軍左金吾衛中郎將兼南陽郡司馬遷右驍衛將軍  
兼上洛郡太守充武關防禦使肅宗降詔書云卿以特  
達之姿抱殊常之畧武關防守委卿一人屬賊陷商於  
復圍闕六字 浙川以保义人吏逆賊悉力來攻六十餘日  
糧盡救絕遂陷賊庭賊將甘言怵君令至城下以紿吳

君忠勇感激捨生徇義抗聲謂吳曰鳳翔諸將已收長  
安誰不能效死軍前辱大夫所使願大夫保守忠義克  
終令圖賊以兵刃毆君君志氣彌厲因被執送洛陽今  
天子收復兩京僅得脫禍其事具向城令王瀟南陽記  
吳又奏君充節度兵馬使君遂辭疾不行稅駕于鄭之  
別墅君所居以清白廉慎聞於朝廷祿俸之餘必賙親  
族之貧者先疇舊業悉畀群從一簪不私于其身又常  
持誦金剛淨名經向逾三紀不如葷血者十年至是無

儋石之儲而處順安時不改其度蓋澹如也識者歸高  
焉粵以上元二年秋九月十四日寢疾而終春秋六十  
有五夫人高平徐氏安西都護高平縣公欽識之女婦  
順母儀克明休德以大厯二年夏六月二十五日終于  
岳州客舍享年五十有六其孤嵩臬中子崙少子峰等  
銜恤允窮竭力襄事以大厯十年冬十月二十四日合  
祔君臬夫人于榮澤縣廣武原遵理命也崙不遠千里  
泣而求蒙敢述無愧之詞式揚不朽之烈銘曰

猗那使君世誦清芬  
顯經飾吏休有令聞  
天子命我參卿西軍  
驟遷大縣克懋殊勲  
讓行親睦耳截冤分  
縻祿食餓馳師解紛  
孤城再邑罷卒益振  
麾守商於移兵浙瀆  
綢繆宸睠焜耀天文  
力盡寇多師陷身屯  
詭詞紿賊解路是羣  
脫禍歸朝義高天雲  
乞骸延闕稅駕洧溱  
志敦禪誦茹絕羶葷  
處順齊終聊樂我云  
刻諸金石永永不泯

顏魯公集卷七

欽定四庫全書

顏魯公集卷八

唐 顏真卿 撰

碑

朝議大夫贈梁州都督上柱國徐府君神道碑銘  
自古遭盛名而功不立都卿相而名不稱者蓋有之矣  
其或荷丕構而繼志不忘在下位而能伸其道克揚前  
烈以承後昆其唯徐君子君諱秀東海郟人也其先出

於伯益實掌舜虞喬孫偃王躬行仁義遂因國命氏焉  
厥後樂以文侍金門稱以禮優塵榻仙人寄傲于賢聖  
偉長首冠於應劉英達相仍有自來矣宋有中書侍郎  
達之司空羨之兄秘書監欽之欽之子尚書僕射中書  
令湛之湛之生黃門侍郎聿之聿之生齊太尉孝嗣孝  
嗣生梁侍中緄緄生陳五兵尚書君敕君敕生丹陽尹  
溫自司空已還四為上公五降帝女尹生隋民部侍郎  
唐贈祕書監諱恕監生金紫光祿大夫右散騎常侍兼

禮部尚書諱筠尚書生庫部郎中萬年令太子詹事諱  
昕皆以盛德濟美垂於世家君即詹事第三子也幼而  
聰悟篤學能屬文事繼親以孝稱十餘歲時父友鳳閣  
侍郎姚元崇示君五百字詩一覽便誦姚公奇之因謂  
納言狄公曰徐子珠華玉潔闕二後但不知命何如耳  
年十五為崇文生應舉考功員外郎沈倫期再試東堂  
壁畫賦公援翰立成沈公駭異之遂擢高第調補幽都  
縣尉充相國尚書趙彥昭朔方節度判官以事去職又

歷蔡州參軍為御史宋遙關內覆囚判官公銳精鞠訊多所全活宋公以為言公正色謂之曰僕從祖父司刑卿天授中詳理冤獄振雪者七十餘家今子孫猶困於襄陵豈忍以束濕之事以自便也因頓首請去宋謝而留之無何或訟冤於執事者召公問狀則他判官之為也宋欲別白旌公公曰僕雖不材豈可藉人之過以為己功乎論者休之戶部侍郎徐知仁請為招慰南蠻判官奏課居最轉瀛州司法參軍侍御史趙願貞辟宣慰



判官歷湖州德清長城潤州丹陽三縣令天寶二載春  
二月加朝散大夫敕攝新安郡別駕採訪使齊澣梁昇  
卿並奏為判官六載秋七月拜臨淮郡長史加朝請大  
夫九載夏四月除濟南郡司馬加朝議大夫十二載春  
三月拜信都郡長史不幸感疾天寶十三載秋七月九  
日終於郡之官舍春秋七十公先世塋壠宅於京師少  
陵原詹事府君巡按河南薨於洛汭因葬於緱氏縣西  
南大寇原公啓手足也顧命其子今侍御史續曰吾家

代儉約不欲華衆歸全之後其以布車一乘虔祔先塋  
續泣而奉之及其葬也塋小無便地於次東馬鞍山下  
得紫龍飲乳岡之原龜筮從也夫人南陽縣君樊氏戶  
部尚書子蓋之曾孫棗州刺史文器之孫廬江太守季  
節之女仁孝柔明閑於禮度左右圖史雅善琴碁中外  
孤弱躬自收視俾夫遠近咸懷安之春秋六十有八棄  
堂帳于相州之安陽天寶十五載秋八月十有四日爰  
遵周公之典而合祔焉禮也廣德二年春二月皇帝有

事于南郊追贈君都督梁州諸軍事梁州刺史夫人南陽郡太君蓋以續簪白筆於赤墀董財賦於巴漢是用有永錫之寵紆褒崇之命哀榮之盛不其至矣君凡四為網佐六奉使軒所至之邦必聞異績舉天下之政事莫不咨折中焉

闕二字

清貧室無長物孤茆叢萃皆仰於

君既嬰沈痼之疾綿歷三載續請就上國之醫庶其逢

吉君曰闔門之資者寸祿也

闕三字

命也吾不以一身易

百口竟不從而歿識者哀之或謂君曰吾奉養孀姊用

度萬錢

關一  
字

張諸姑縑纔五兩姑見

關三  
字

君笑而不答

退謂續曰吾見其撫孤不見其怨德教義之士有以見

其用心也君怡淡寡欲雅好攝生在新安或指靈叟於

關一  
字

君齋心四日采入其阻而後覲之訊其來由陳思

王東閣祭酒蔣覲也說魏時事歷歷可聽君稽首而斬

之叟曰從我乎必可度世君以王事靡盬退而辭焉比

迴顧則為茅草矣初君上計濟南展羣祖之墓松檟森

然徽猷莫紀留居論譔以日

關一  
字

成先德之不忘

闕三字

緊是舉也嗚呼君體聰穎之上姿恬曠之夷度寬

明足以濟衆和義足以長人口絕莠言目無還視立身  
先張仲之志與朋服子路之言內行可以質神明清規  
可以勵風俗宜克享胡耆荷天之龍光輔乎漢之得人  
高視乎周之列位而道之將喪命不偶時屈輿驥於身  
前闕四字歿後吁足嘆也春秋貴九世卿族漢史稱七葉  
珥貂陪臣于下士闕二字絕屬於天潢戚里豈比夫登台  
者四世尚主者五人焜燿於數朝之間蟬聯於百代之

下可同年而語矣。續懿文懋學峻節清標。天寶末陷居賊中。為偽命連辟辭疾不起。謀使家人與本朝通計為部曲所發。遂遭禁詰。一日之中。議刑者數焉。俄而官軍大至。賊黨奔北。由是獲免。乾元中。奉使巴渝。屬段子璋構逆流輩十人。皆被屠害。以續高名欲留同惡。期之以死。承劍不回。闕一字諸道徵求之。不堪命。續至之。邦必荷仁信如期而畢。則闕三字將崇必復之矣。寧止當朝之望。俾銘功伐。敢墜斯文。其辭曰。

益為帝虞偃不異途世表東海其惟徐乎或文  
或武或哲或儒休美後昆厥德不孤猗邨都督克懋遠  
圖邦國四佐輶軒六徂樹聲長世與道為徒爰覲幽關一

字  
無寧集枯

關六

何

關一

仁義都盡彭殤曷殊所嗟人

紀莫展嘉謨馬鞍山北龍乳岡隅於焉崇祔先志靡渝

豐碑崔嵬宰樹紫紆

關六

沾濡

京兆尹御史中丞梓遂杭三州刺史劍南東川節

度使杜公神道碑銘

征鎮四出鑿門之寄崇邦畿千里內史之官取非夫任  
均周召名軼趙張則何以展心膂之謀光鈺簫之製者  
矣公諱濟字應物京兆杜陵人晉征南大將軍當陽侯  
元凱十四代孫周禮部侍郎殿內監闕一棠公懿之來  
孫隋符璽郎乾祐之玄孫皇度支員外主客郎中續之  
曾孫朝散大夫明堂丞贈潤州刺史讓之孫高陵令贈  
太子少保惠之第三子也器識通簡履懷坦易以文飾  
吏用晦而明逗機而舉無遺諛泣事而照有餘地早歲



以寢郎從調書判超等為李吏部彭年所賞補梁州南  
鄭主簿州主司馬垂為山南西道採訪使引在幕下俄  
丁內艱終制轉許州長社尉陽光勰都督隴西奏公為  
法曹皇甫侁採訪江西奏公為推官授大理司直攝殿  
中侍御史賜緋魚袋除正除殿中俄宰郿縣相國李峴  
尹京兆奏公為渭南尉僕射裴冕為劍南奏公為成都  
令遷綿州刺史賜紫金魚袋屬徐知道作亂使裨將曹  
懷信招公公執以歸朝除戶部郎中加朝散大夫廣德

中檢校駕部郎中上柱國公善與人交於嚴武情均莫  
逆武再充劍南節度為武行軍司馬郭英義之代武也  
矯宣恩命毀玄宗宮為節度使宅公驚其異謀移疾不  
視事今司空冀國公崔寧既誅英義請知使事公堅卧  
不起仍俾通泉令今前殿中侍御史韋都賓密使家僮  
潛表事實大厯初杜鴻漸分蜀為東西川公為副元帥  
判官知東川節度拜大中大夫綿劍梓遂渝合龍普等  
州都防禦使梓州刺史兼御史中丞公以威信馭戎寬

明莅俗克念八州之地

闕一靖

兩川之人朝廷嘉之尋

拜東川節度使俄而移軍復為遂州都督徵拜給事中  
間歲拜京兆少尹明日遷京兆尹出為杭州刺史不逾  
周歲風化大行不幸感疾又聞代到請尋醫于晉陵以  
大厯十二年歲次丁巳秋七月二日辛亥薨於常州之  
別館春秋五十有八夫人京兆韋氏曰平仲房州刺史  
景駿之孫禮部尚書瑯琊王邱之外孫太子中舍迪之  
第三女也精識高明正家柔克移天有幹夫之蠱宜室

多綏族之仁六姻稱其壺則四德被於彤管生三子四女而公即世夫人晝哭茹毒星言割哀留子壻秘書省校書郎范陽盧少康泉二子匡陟緝寧家殘獨與子肅匍匐萬里以祇護喪櫬冬十一月至上都二十四日壬申虔寔公子萬年縣洪原鄉之少陵原柩先塋也仍自為祭文以抒意其略曰周旋吳蜀備歷艱危不陷寇難賴君携持一朝孤立更復何依魚失水而鱗悴樹無根而葉萎詞理清婉才情懇到聞者傷慙焉於戲公以傑

俊之材當艱虞之際伸其智略宣力盛時頡頏鴛鷺之間總統龍犀之節旋登瑣闥驟陟尹畿方當焜燿高衢升凌台序而一麾出守鍛翮江皋竟吉往而凶歸齋此志而歿地吾道惜矣真卿何幸得忝維私未終倚玉之歡遽切據梧之恨吁足痛也銘曰

杜侯我我令聞猗那其用於世為猷匪他理稱易簡政絕煩苛州縣發跡雲霄切摩化存江許威肅岷嶠巴蜀靖謐精誠孔多瑣闥久拜亞尹遄過始陟京兆旋移浙

河云如不吊邁此凶瘡哲婦哭盡獲喪崩波祔于先塋  
映蔚條柯曷用表德勒銘墳阿

顏魯公集卷八

欽定四庫全書

顏魯公集卷九

唐 顏真卿 撰

碑

晉紫虛元君領上真司命南嶽夫人魏夫人仙壇  
碑銘

夫人諱華存字賢安任城人晉司徒劇陽文康公舒之  
女也師於小有清虛真人王褒哀命中侯上仙范邈為

立傳其略云夫人挺瓊蘭之流映體自然之靈璞志逸  
雲霞明潔鮮蔚天才卓異玄標幽拔少讀老莊三傳五  
經百子無不該覽性樂神仙味真慕道少服胡麻散茯  
苓丸吐納氣液攝生夷靜親戚往來一無闕見常欲別  
居閒處父母不許年二十四強適太保掾南陽劉文幼  
彥生二子璞遐幼彥後為修武令夫人心期幽靈精誠  
苦盡逮子息粗立乃離隔室宇齋于別寢清修百日忽  
有太極真人安度明東華大神方諸青童扶桑碧河湯



谷神王景林真人小有仙王清虛真人王褒來降褒謂夫人曰聞子密緯真氣太帝君敕我授子神真之道青童曰清虛爾之師也度明曰子苦心求道道今來矣景林曰虛皇鑒爾勤感太極已注子於玉札子其勗哉青童又曰子不受聞上道內法晨景玉經者仙道無緣得成也後日當會陽洛山中爾勤密之矣三君乃命侍女開玉笈出太上寶文八索隱身大洞冥經高仙羽玄等書三十一卷手授夫人焉此皆王君昔遇南極夫人西

欽定四庫全書

卷九

城真人王方平於陽洛山所受之本經也山中有洞臺是清虛之別宮王君至是北向祝誓於夫人曰太上三元九皇高真虛微八道玉清玉泉哀為太帝所敕于魏華存又說太極白簡青錄金刻玉文有得見此三十一卷書者之姓名也凡此寶書起自清虛真人授太師西城王君紫元夫人從是當七人得之以白玉為簡青玉為字至是夫人為四矣於是景林又授夫人黃庭內景經令晝夜誦讀萬遍乃得洞觀鬼神此乃不死之道也

於是四真吟唱各命玉女彈琴擊鐘吹簫合節而發歌  
歌畢王君乃解語夫人向所授書存思指歸寶經節度  
行事口訣諸要粗訖徐乃別去凡二夕一日共會在曲  
靜之中自此之後王君及西城真人諸元君夫人互有  
來往或與隔壁共庭初不駭悟已而幼彥以暴疾殞世  
值天下荒亂夫人撫養內外傍救窮乏超羣先覺乃携  
細小徑來東南及兒息各大並處官位至于守靜之思  
與日而進也凡在世八十三年以成帝咸和九年歲在

甲午王君乃與東華青童來降與夫人靈藥兩齊使頓服之尅期會于陽洛宮夫人服藥稱疾閉目寢息飲而不食七日夜半太一玄仙遺飈車來迎夫人用藏景之法託形神劍化成死骸始終外朗仙化內逸冥變隱適從此而絕子璞時為庾司空司馬遐時為陶太尉從事中郎安城太守故夫人自此隱化淪景須臾至陽洛山明日青童君太極四真人清虛王君三天法師張道陵等凡四十七真人降教夫人于隱元之臺王君令夫人

清齋五百日讀大洞真經并分別登真秘奧道陵授以

新出明威章

闕一字

入靜存祝吏兵符錄之訣衆真各標

至訓三日而去道教所以備教委曲者以夫人在世為  
女官祭酒領職理故也夫人遂修齋讀經誦研萬過積  
十六年顏如少女於是龜山九靈太真西王母金闕聖  
君南極元君乃共來迎夫人遂白日升晨北詣上清宮  
玉闕之下太微天帝中央王老君三素高元君太上玉  
晨大道君太素三元君扶桑大帝君金闕後聖君各令

使者致命授夫人玉札金文位為紫虛元君領上真司  
命南嶽夫人比秩仙公使治天台大霍山洞臺之中主  
下訓奉道教授當真仙者而男之高仙曰真人女曰元  
君於是夫人受錫事畢王母及金闕聖君南極元君各  
去使夫人於王屋小有之中更齋戒三日畢九微元君  
龜山王母三元夫人馮雙禮珠衆諸衆仙並降夫人於  
小有清虛上宮絳房之中時夫人與王君為賓主焉神  
有羅陳金觴四奏各命侍女陳曲成之鈞九雲合節八

音零粲於是西王母擊節而歌歌畢馮雙禮珠彈雲璈而答歌餘真人各歌須臾司命神仙請隸屬及南嶽神靈迎官並至虎旂龍輦激曜數百里中西王母諸真乃共與夫人東南行俱詣天台霍山臺又使道過句曲金壇茅叔申宴會二日二夕又共適于霍山夫人安駕玉宇然後各別初王君告夫人曰學者當去疾除病因受甘草丸所謂穀仙方也夫人服之而仙夫人能隸書為王君立傳事甚詳悉又述青精飴飴注黃庭內景經自

後屢降茅山子璞後至侍中蒙使傳法于司徒瑯琊王  
舍人楊羲護軍長史許穆穆子玉斧並升仙事具陶弘  
景真誥所呼南真即夫人也初夫人既渡江徧遊名山  
至臨川郡臨汝水西立壇置精舍院東百餘步造冢壙  
又於石井山建立壇場往來遊憩歲月深久榛蕪淪翳  
雖備載圖經而略遺無跡有唐女道士黃令微道行高  
遠八十而有少容蹀躞而行奔馬不及時人見其顏色  
殊異號曰花姑聞夫人靈迹長壽二年歲在壬辰冬十



月乃訊於洪州西山道士胡超超能通神明遙指郭南  
六里烏龜原有石龜每犯田苗被人擊首折其處是也  
姑與道流尋訪見龜在壇中央其下得尊像油甕鎗刀  
燈盞之類俄夢夫人指九曲池於壇南獲之磚砌猶在  
景雲中睿宗使道士葉善信將繡像幡花來修法事仍  
於壇西置洞靈觀度女道士七人開元初玄宗使醮祭  
祈禱不絕每有風雨或聞簫管之聲入室禮謁必須嚴  
潔不爾必有蛇虎驚吼之異時時有雲如烏鳥羣飛垂

帶直下壇上倏忽不見西出如向井山前後非一已而  
花姑肝蠻間如有告者曰井山古跡汝須崇建俄聞異  
香從西來姑行宿洞口聞鐘磬之音遲明入山果遇壇  
殿餘址遂建立屋宇屢聞仙梵之響環壇數里有採斫  
及不精潔者必有恠異之警有野象中箭來投花姑姑  
為拔之後每齋前則銜蓮藕以獻姑開元九年姑欲上  
升告弟子曰勿釘吾棺可以絳紗幕之已而霆雷震擊  
紗上有孔大如雞卵棺中唯有被覆木簡屋上穿可容

人座前奠瓜數日生蔓結實如桃者二每至忌辰則風  
雨鬱勃直入室內玄宗聞而駭之覆視明白使道士蔡  
偉編入後仙傳二十九年春三月乙酉使道士齋龍壁  
來醮忽有白鹿自壇東出至冢間而滅五色仙蛾集壇  
上刺史范陽張景佚以為聖德感應立碑頌述天寶八  
載以夫人得道升仙之所度女道士二人見修香火大  
厯三年真卿叨刺是州言崇禮謁郊郭蒙遽瞿蒲震驚  
女弱曹逃豺狼窟聚真儀如在壇殿歸然瞻仰徘徊悄

焉若失有仙壇觀道士譚仙巖者修真目遠法侶是宗  
請以男官黃道士二七人抽隸洞靈共申灑掃高行女  
道士黎瓊仙七人萃居壇院精力住持已久率勵往來  
增修觀宇從之不日適暨厥成仙迹之載崇師之力也  
敢備其本末而為頌云銘曰

紫虛元君維魏夫人位列五嶽名高七真凝華台肩奪  
志劉嬪太帝昭懇清虛降神群仙畢會玉笈斯陳服道  
日損精心益勤蛻形神劍託馭飈輪適抵陽洛邁登隱

元黃庭朗詠白日升辰西降王母東過叔申傳法侍中

許楊

或作陽非

為隣伊昔南渡爰居汝濱壇場處所埋沒荒

榛實賴花姑諗于胡尊果獲靈迹烏龜之原次尋井山  
實叶曩言嫣然簡解紗幕空存野象銜藕靈瓜吐根恠  
異昭彰不可殫論二聖竦駭屢崇明禋于嗟女弱香火  
堙淪真卿刺州謁拜思頻乃命仙子增修鼎新花姑侍  
傍異代同塵昌表玄德銘功翠珉垂諸來裔垓北無垠

撫州臨川縣井山華姑仙壇碑銘

華姑者姓黃氏諱令微撫州臨川人也少乃好道風神卓異天然絕粒年十二度為天寶觀女道士年八十髮白面紅如處子狀時人謂之華姑牒展而行奔馬不及聞魏夫人仙壇在州郭之南草木榛翳結廬求之不得長壽二年歲在壬辰冬十月壬申朔訪于洪州西山胡天師天師名超能役使鬼神見其懇切遙指姑所居南二百步曰烏龜原中有石龜每蹂踐田苗百姓患之乃擊斷其首即其處也明日與姑登山顧望西面有池水

焉天師謂姑曰池中有見乎曰無師遂舉左手令姑  
自腋下觀之四仙浴焉師曰余有道分必當得之因留  
與語數日虔誠尋訪遂獲石龜於壇中央掘其下得尊  
像及刀鋸各一油甕五口燈盞數十箇天后聞之盡收  
入內姑嘗于旦夕精思想象之間忽有告曰壇南有九  
曲池汝可開之姑從而獲焉塼砌盡在他日有異香綵  
雲從西南而來其夕夢有人謂姑曰井山道場何不修  
葺姑未及往忽然感疾姑曰得非違尊教所致乎翌日

病愈又聞異香而宿于谷口聞鐘聲遲明入山果獲壇  
殿地砌北半峰有自然石井深可三尺濶丈餘故名井  
山天欲雨則雲霧先起姑既建置精舍時聞仙梵之音  
環壇五七里間莫敢樵採姑遂灑掃修葺極其力焉人  
或不潔不誠必遭蛇虎恠異之警迷不能出矣至今猶  
然有野象為獵人所射來姑前姑為拔箭其後每至齋  
時即銜蓮藕以獻姑開元九年欲上昇之際忽謂弟子  
曰不須釘吾棺可以絳紗幕之數夕有雷震繞視紗頂



孔如雞卵屋穿容人棺中唯被覆木簡而已弟子奠瓜  
數日生蔓長數尺結實二顆其大如桃姑同學弟子黎  
瓊仙恒服茯苓胡麻絕粒四十餘秋年八十齒髮不衰  
六七歲時親覩其事每至忌晨即風雲蓊鬱直入室內  
村墅路人往往見絳雲白鶴飛入洞口清齋行道時每  
有一朱鬃白馬在壇側逼之則奔而出外捨之則隨而  
復來靈異昭彰不可談悉仙巖史玄同左通玄等每至  
三元恒修齋醮大厯三年真卿獲刺是州明年春三月

山下有女道士曾妙行夢一女師令上層華樹層層掇  
食及悟猶飽因是不食嘗於觀中見黎瓊仙跪而拜曰  
夢中所見乃尊師也因請依之于今覺韶顏潤澤虔修  
香火於此山遐邇駭慕焉於乎昔麻姑得道而名山南  
真仙昇於龜原華姑翦於茲嶺瓊仙妙行接踵而出非  
夫天地所嚮從古以然則何以仙氣氤氲若斯者矣真  
卿幸因述職親覩厥猷若默而不言則來者奚述乃為  
銘曰

綽綽華姑真仙品徒芳蓮比色逸駿爭驅南郭從魏西  
山訪胡腋窺浴泉原獲龜烏靈跡既儼曲池猶汚鼎新  
廟貌煥發規模名曰井山終焉不逾衆來藹獻馬見髻  
朱簡解空存紗穿上徂奠瓜吐實藹室雲趨妙行精持  
高真是俞勒銘翠琰永播玄都

浪跡先生玄真子張志和碑

士有牢籠太虛撒掖玄造擺元氣而詞鋒首出軋無間  
而理窟肌分者其唯玄真子乎玄真子姓張氏本名龜

齡東陽金華人父遊朝清真好道著南華象罔說十卷  
又著冲虛曰馬非馬證八卷代莫知之母留氏夢楓生  
腹上因而誕焉年十六遊太學以明第擢第獻策肅宗  
深蒙賞重令翰林待詔授左金吾衛錄事參軍仍改名  
志和字子同尋復貶南浦尉經量移不願之任得還本  
貫既而親喪無復宦情遂扁舟垂綸浮三江泛五湖自  
謂烟波釣徒著十二卷凡三萬言號玄真子遂以稱焉  
客或以其文論道縱橫謂之造化鼓吹京兆韋諱為作

內解玄真又述太易十五卷凡二百六十有五卦以有  
無為宗觀者以為碧虛金骨兄浦陽尉鶴齡亦有文學  
恐玄真浪跡不還乃於會稽東郭買地結茅齋以居之  
閉竹門十年不出吏人嘗呼為搗河夫執畚就役曾無  
忤色又欲以大布為褐裘復徐氏聞之手為織纊一製  
十年方暑不解所居草堂椽柱皮節皆存而無斤斧之  
跡文士効柏梁體作歌者十餘人浙江東觀察使御史  
大夫陳公少遊聞而謁之坐必終日因表其所居曰玄

真坊又以門巷湫隘出錢買地以立閑閣旌曰迴軒巷  
仍命評事劉太真為叙因賦柏梁之什文士詩以美之  
者十五人既門隔流水十年無橋陳公遂為舩造行者  
謂之大夫橋遂作告大夫橋文以謝之常以豹皮為度  
駿皮為屨隱素木几酌班螺杯鳴榔杖拏隨意取適垂  
釣去餌不在得魚肅宗嘗錫奴婢各一玄真配為夫妻  
名夫曰漁僮妻曰樵青人問其故魚僮使捧釣收綸蘆  
中鼓枻樵青使蘓蘭薪桂竹裏煎茶竟陵子陸羽校書

卽裴修嘗謂問有何人往來答曰太虛作室而共居夜  
月為燈以同照與四海諸公未嘗離別有何往來性好  
畫山水皆因酒酣乘興擊鼓吹笛或閉目或背面舞筆  
飛墨應節而成大厯九年秋八月訊真卿于湖州前御  
史李萼以縑帳請焉或揮灑橫掃音布而纖纊霏拂亂槍  
而攢毫雷馳須臾之間千變萬化蓬壺髣髴而隱見天  
水微茫而昭合觀者如堵轟然愕眙在坐六十餘人玄  
真命各言爵里紀年名字第行于其下作兩句題目命

酒以蕉葉書之授翰立成潛皆屬對舉席駭歎竟陵子  
因命畫工圖而次焉真卿以舫艫既敝請命更之答曰  
儻惠漁舟願以為浮家泛宅沿泝江湖之上往來茗雪  
之間野夫之幸矣其詼諧辯捷皆此類也然立性孤峻  
不可得而親踈率誠澹然人莫窺其喜愠視軒裳如草  
芥屏嗜欲若泥沙希跡乎道丈夫同符乎古作者莫可  
測也忽焉去我思德茲深曷以寘懷寄諸他山之石銘

曰



邈玄真超隱淪齊得喪甘賤貧泛湖海同光塵宅漁舟  
垂釣綸輔明主斯若人豈烟波終此身

茅山玄靖先生廣陵李君碑銘

先生姓李氏諱含光廣陵江都人本名弘以孝敬皇帝  
廟諱改焉二十一代祖宏江夏太守避王莽徙居晉陵  
遂為郡人高祖文薨陳桂陽王國侍郎曾祖榮皇朝雷  
州司馬祖師龕隱居以求其志徙于江都父孝感博學  
好古雅修彭聃之道與天台司馬鍊師子微為方外之

交尤以篤慎著于州里考行議謚曰正隱先生母瑯琊王氏賢明有德行先生孩提則有殊異晬日獨取孝經如捧讀焉羈邕好靜處誦習墳典年十八志求道妙遂師事同邑李先生遊藝數年神龍初以清行度為道士居龍興觀尤精老莊周易之深趣執喪過哀口不嘗甘旨之味食唯穠麥而已封植膳羞皆經其手號毀骨立親族莫不傷之開元十七年從司馬鍊師於王屋山傳授大法靈文金記一覽無遺綜核古今該明奧旨玄宗

知先生徧得子微之道乃詔先生居王屋山陽臺觀以  
繼之歲餘請居茅山纂修經法頻徵皆謝病不出天寶  
四載冬乃命中官齋璽書徵之既至延入禁中每欲詔  
稟必先齋沐他日請傳道法先生辭以足疾不任科儀  
者數焉玄宗知不可強而止先生嘗以茅山靈跡剪焉  
將墮真經秘籙亦多散落請歸修葺乃特詔於楊許舊  
居紫陽以宅之仍賜絹二百疋法衣兩副香爐一具御  
製詩及序以餞之又禁於山側採捕漁獵食葷血者不

得輒入公私祈禱咸絕牲牢先生以六載秋到山是歲  
詔書三至渥澤頻繁輝映岷谷初山中有上清真人許  
長史楊君陶隱居自寫經法歷代傳寶時遭喪亂散逸  
無遺先生奉詔搜求悉備其跡而進上之先時玄宗將  
求大法請先生為師先生竟執謙冲辭疾而退洎七載  
春玄宗又欲受三洞真經以其年春之三月申官齋璽  
書云其月十八日尅授經誥是日於大同殿潔修其事  
遂遙請先生為玄師并賜衣一襲以伸師資之禮因以

玄靖為先生之嘉號焉仍詔刻石於華陽洞宮以誌之  
是歲夏五月隱居先生合丹之所有芝草八十一莖散  
生於松石之間詔俾先生與中官啓告靈仙緘封表進  
夏又詔以紫陽觀側近二百戶太平崇元兩觀各一百  
戶並蠲其官徭以供香火秋七月又徵先生既至請居  
道觀以養疾九載春辭歸舊山其年夏六月前生靈芝  
之所又產三百餘莖煌煌秀異人所莫覩先生又圖而  
奏之是歲冬又徵先生於紫庭別院館之十載秋先生

又懇辭告老御製序詩以餞之十有一載先生奉詔與  
門人韋景昭等於紫陽之東鬱岡山別建齋院立心誠  
肅是夜仙壇林間遍生甘露因以上聞特詔嘉異初隱  
居先生以三洞真法傳昇玄先生昇玄付體玄先生體  
玄付正一先生正一付先生自先生距於隱居凡五葉  
矣皆總集妙門大正真法所以茅山為天下道學之所  
宗矣於戲是非可齊也我物均焉生死可忘也覺夢同  
焉如出可域心於變化之際哉先生以大厯己酉歲冬

十一月十有四日遁化於茅山紫陽之別院春秋八十有七其年十二月八日門人赴喪而至者凡數千人號奉冠舄遷窆于雷平山之西陞遺命以松棺竹杖木几水瓶香奩香爐置於藏門內弟子等仰奉嘉猷克遵儉德先生識真氣淳業行高古道窮性情之本學冠天人之際所以優游句曲鬱為王者之師出入明庭特寵肩輿之貴是知順風而問昔稱於黃帝望山而請今見於玄宗矣又博覽羣言長於著撰嘗以本草之書精明藥物

事關性命難用因循著音義兩卷又以老莊周易為潔  
靜之書著學記義略各三篇內學記二篇以續仙家之  
遺事皆名實無違詞旨該博初先生幼年頗工篆籀而  
隸書尤妙或賞之云賢於其父因投筆不書玄宗詔山  
人王旼強請先生楷書上經一十三紙以補楊許之闕  
先生能於陰陽數術之道而不以藝業為能極於轉鍊  
服食之事而不以壽養為極但冥懷素朴妙味玄津非  
夫博大之至人孰能盡於此真卿乾元二年以昇州刺



史充浙江西節度欽承至德結慕玄微遂專使致書於  
茅山以抒誠懇先生特令韋鍊師景昭復書於真卿思  
眷綢繆足勵超然之至然可師可仰望紫府而非遙王  
事不遑寄白雲而悠遠洎大厯六年真卿罷刺臨川旋  
舟建鄴將宅心小嶺長庇高蹤而轉刺吳興事乖夙願  
徘徊郡邑空懷尊道之心瞻望林巒永貞借山之記而  
景昭洎郭閎等以先生茂烈芳猷願銘金石乃邀道士  
劉明素來託斯文真卿與先生門人中林子殷淑遺名

子韋渠牟嘗接采真之遊緒聞含一之德敢強名於巷  
黨曷足辨於鴻蒙其詞曰

抱一混茫人之紀綱先生以之氣王神強乃啓玄旨玄  
門以彰乃為帝師帝道惟康甘露呈瑞靈芝効祥上士  
云感高風再揚鶴返仙廟雲辭帝鄉退歸而老妙識行  
藏德本無累道心有常寔曰形解孰云坐亡代石表墓  
勒銘傳芳谷變陵遷厥跡彌光

顏魯公集卷九

欽定四庫全書

顏魯公集卷十

唐 顏真卿 撰

墓碣墓誌

曹州司法參軍祕書省麗正殿二學士殷君墓碣

銘

善父母之謂孝睦昆友之謂悌孝悌也者其仁之本歟  
經天緯地之謂文博古知今之謂學文學也者其德之

蘊歟誰其兼之即我伯舅殷君其人矣君諱踐猷字伯

起陳郡長平人五代祖不害

舊集作不古非

以孝見梁書高祖

英童周御正中大夫麟趾學士曾祖聞禮唐太子中書

舍人弘文館學士祖令言校書郎淄川令父子敬太常

博士吳令累葉皆以德行名義儒學翰墨聞于前朝君

即吳縣之元子幼而聰悟絕倫長而典禮不易年十三

日誦左傳二十五紙讀稽聖傳一遍亦誦之博覽羣言

尤精史記漢書百家氏族之說至於陰陽數術醫方刑

法之流無不該洞焉與賀知章陸象先我伯父元孫韋  
述友善賀呼君為總龜以龜千年五聚問無不知也君  
性方正志業淳深識理清遠人皆望而服之解褐杭州  
參軍刺史宗璟以相國之重簡貴自居無所推揖每見  
君必特加禮敬政事之諉謹者皆咨決焉開元初舉文  
儒異等授秘書省學士尋改曹州司法參軍麗正殿學  
士與韋述袁暉同修王儉今書七志及羣書四錄流別  
銓次皆折衷於君璟與蘓頲既入相每引君詢以當代

之務友于兄弟羣從宗黨必盡糾綏之恩長妹蘭陵郡太夫人真卿先妣也中年孀嫠遺孤十人未能自振君悉心訓獎皆究恩意故能長而有立開元九年秋七月九日有叔父臨黃尉子玄之喪哀慟嘔血終於京師通化坊之私第夫人蘭陵蕭氏司空瑤之玄孫括州司馬宋國公興宗之女賢和齊肅秉修禮度能讀論語周易泛觀史傳率諸婦以和義故閨範修睦焉君之捐館以清白留遺家道索然夫人躬甘菲糲勸勉桑穡晏息晨

興以率勵僮僕行之數歲經費羨焉教誨三子攝寅克  
齊等皆克負荷攝大斌令克齊高平尉為真卿河東覆  
屯軍試判官並不幸早世寅聰達有精識能繼先父之  
業有大名於天下舉宏詞太子校書永寧尉並殺謾吏  
貶移澄城丞久疾將歿顧瞻太夫人欲訣不忍其子監  
察御史亮年未志學隱而潛盡之及寅卒斬指剪髮寘  
于棺中誓事太夫人不敢渝常日

闕一字

有疾不脫衣帶

者數年故白燕巢于苦楫乾元元年太夫人季女適于

邠州司法陸超板輿隨牒俄而遘疾三月朔日終于超  
之官舍春秋八十有一龜筮未從因權殯于三水亮以  
校書郎遷壽安尉為真卿荆南節度推官廣德二年十  
有二月與弟今榮陽尉永匍匐徒步力護雙櫬合祔君  
夫人于新安縣之龍澗原三子瑩從理命也嗚呼以君  
之才之美被服純行加人數等清修素業為代元龜竟  
不得贊皇極而叶彝倫登泰階而儀百辟不其惜矣嗟  
乎仲尼聖者也終于魯司寇而

闕一字

官與之比公明達



者也年纔四十八而君壽與之齊豈聖賢之道有遭遇  
乎將運命之數有窮通乎茲小子所以獻疑而述報施  
也大厯五年夏五月真卿以恩宥刺撫于州採石刻頌  
丹寄碣于墓左銘曰

殷之後昆奕葉儒門盛烈存兮君能濟美於穆不已明  
德尊兮運促道長身歿名揚教義敦兮合祔先寔述遵  
理命哀順孫兮高墳崔嵬龍澗之隈映鮮原兮斯焉寔  
止以望吾子慰營魂兮

京兆尹兼中丞杭州刺史劍南東川節度使杜公

墓誌銘

九有無虞行師貴於社席四方取則鉤距資乎浩穰誰  
其有之則杜公其人矣公諱濟字應物京兆杜陵人皇  
主客郎中續之曾孫明堂令知讓之孫贈太子少保惠  
之第三子姿度韶舉心靈敏達在家必聞既蘊睦親之  
志所居則化多稱不器之能解褐南鄭主簿州主司馬  
垂引在使幕轉長杜尉隴西法曹皇甫旆江西採訪推

官授大理司直攝殿中侍御史賜緋魚袋尋正除殿中  
歷宰郿渭南成都三縣綿將刺史賜紫金魚袋戶部郎  
中加朝散大夫廣德中檢校駕部郎中上柱國允嚴武  
劍南行軍司馬杜鴻漸分蜀為東西川以公為副元帥  
判官知東川節度拜大中大夫綿劍梓遂都防禦使梓  
州刺史兼中丞時寇盜充斥公示以威信八將之不隕  
公之力焉尋拜東川節度使俄而移軍復為遂將都督  
徵拜給事中間歲拜京兆少尹明日還京兆尹出為杭

州刺史公務清簡庭落若無吏焉不幸感風疾以大厯十二年歲次丁巳秋七月二日辛亥薨于常州之別館春秋五十有八夫人京兆韋氏太子中舍迪之第三女也沉敏精深高明柔克幹夫之蠱以懋厥家生三子四女而公即世夫人星言晝哭躬護櫬輅與子楊以冬十一月二十有四日壬申歸窆公于萬年縣洪原鄉之少陵原祔先塋也嗚呼以公之志業材力宜其振搏鱗翮凌厲清浮而命逢成山功虧長世吁足恨也真卿忝

居友壻亟接周行痛音徽之永隔感存歿其何已銘曰  
藹藹顒顒時維杜公業先臺省政洽軍戎乃尹京師乃  
麾江東帝方俟理命則不融內子護喪哀哀送終


祭文

祭姪季明文

維乾元元年歲次戊戌九月庚午朔三日壬申第十三  
叔銀青光祿大夫使持節蒲州諸軍事蒲州刺史上輕  
車都尉丹陽縣開國侯真卿以清酌庶羞祭于亡姪贈

贊善大夫季明之靈惟爾挺生夙撰幼德宗廟瑚璉階  
庭蘭玉每慰人心方期戢穀何圖逆賊間疊稱兵犯順  
爾父竭誠常山作郡余時受命亦在平原仁兄愛我俾  
爾傳書爾既歸止爰開土門土門既開兇威大震賊臣  
不久孤域圍逼父陷子死巢傾卵覆天不悔禍誰為荼  
毒念爾遘殘百身何贖嗚呼哀哉吾承天澤移收河關  
泉明比者再陷常山攜爾首櫬及茲同還撫念摧切震  
悼心顏方俟遠日卜爾幽宅魂而有知無嗟久客嗚呼

哀哉尚饗



顏魯公集卷十



欽定四庫全書

集部

顏魯公集卷十一至  
四

詳校官侍郎<sub>臣</sub>李封

檢討<sub>臣</sub>何思鈞覆勘

總校官檢討<sub>臣</sub>何思鈞

校對官編修<sub>臣</sub>李鎔

謄錄監生<sub>臣</sub>蘇鳳池

欽定四庫全書

顏魯公集卷十一

唐 顏真卿 撰

書帖

與李太保帖

不審所苦何如奉計已痊復真卿緣馬病朝迴已乏未  
遂馳謁謹勒參候不次謹狀十一日刑部尚書顏真卿  
狀上李太保大夫公閣下又于手贊檢未得帖之謹空

比拙於生事舉家食粥來已數月今又罄竭祇益憂煎  
輒侍深情故令投告惠及少米實濟艱勤仍恕干煩也  
真卿狀

陰寒不審太保所苦何如承渴已損深慰馳仰所檢贊  
猶未獲望於文書細檢也病妻服藥要少鹿肉脯有新  
好者望惠少許幸甚幸甚專馳謁不次謹狀二十九日  
刑部尚書顏真卿狀上李太保大夫公閣下謹空

與盧倉曹帖

昨奉辭但增悵仰承已過埭不得重別情深惘然珍重  
謹此不宣真卿白二十四日

與蔡明遠帖

蔡明遠鄱陽人真卿昔刺饒州即嘗趨事及來江右無  
改厥勤靖言此心有足嘉者一昨緣受替歸北中止金陵  
闔門百口幾至餬口明遠與夏鎮不遠數千里冒涉江  
湖連舸而來不愆晷刻竟達命干秦淮之上又隨我于  
邗溝之東追攀不疲以至邵伯南埭始終之際良有可

稱今既已事方旋指期斯復江路悠緬風濤浩然行  
李之間深宜尚慎不宣真卿報

聞鄒游與明遠同來欲至采石計其不久亦合及吾淮  
泗之間脫若未到見之宜傳此意遣此不宣真卿報蔡  
明遠

與夫人帖

真卿頓首奉承十四日遷厝承問悲慕不能自勝惟攀  
慕不及摧毀何堪痛當奈何痛當奈何凝寒惟動靜支適

兒子等保侍真卿離官已久事須十間前至鄭州汴州  
已來專奉侍一日只擬一驛計過大事後發猶恐遲必  
望知此緩急勿遲滯足下不來義無獨去之法必請矜  
此狼狽所望今到汴州水下不愁河凍書祭器等先下  
舡去真卿十一日且發東京佇望早來早來謹不次真  
卿頓首夫人閣下 十一月八日 問訊頌翺蒙郎郎  
和奴光嚴深遠憶或至十三日得發

寒食帖

天氣殊未佳汝定成行否寒食只數日間得且住為佳耳

蔡州帖

題驛舍壁

真卿奉命來此事期未竟止終忠勤無有旋意然中心  
悵悵

悵悵集  
作悵非

始終不改游于波濤宜得斯報千百年間

察真卿心者見此一事知我是行亦足達於時命耳

人心無路見時事只天知

舊集後二  
句不載

與郭僕射書

十一月日某謹奉書于右僕射定襄郡王郭公閣下蓋  
太上有立德其次有立功是之謂不朽抑又聞之端揆  
者百寮之師長諸侯王者人臣之極地今僕射挺不朽  
之功業當人臣之極地豈不以才為世出功冠一時挫  
思明跋扈之師抗迴紇無厭之請故得身畫凌烟之閣  
名藏太室之廷吁足畏也然美則美矣而終始之難故  
曰滿而不溢所以長守富也高而不危所以長守貴也  
可不儆懼乎書曰爾唯弗矜天下莫與汝爭功爾唯不



伐天下莫與汝爭能以齊桓公之盛業片言勤王則九合諸侯一匡天下葵丘之會微有振矜而叛者九國故曰行百里者半九十里言晚節末路之難也從古至今暨我高祖太宗已來未有行此而不理廢此而不亂者也前者菩提寺行香僕射指麾宰相與兩省臺省已下常叅官並為一行坐魚開府及僕射率諸軍將為一行坐若一時從權猶未可何況積習更行之乎一昨以郭令公以父子之軍破犬羊兇逆之衆衆情快喜恨不頂

而戴之是用有興道之會僕射又不悟前失竟率意而  
指麾不顧班秩之高下不論文武之左右苟以取悅軍  
容為心曾不顧百寮之側目亦何異清晝攫金之士哉  
甚非謂也君子愛人以禮不聞姑息僕射得不深念之  
乎某竊聞軍容之為人清修梵行深入佛海況乎收東  
京有殄賊之業守陝城有戴天之功朝野之人所共貴  
仰豈獨有分於僕射哉加以利衰塗割恬然於心固不  
以一毀加怒一敬加喜尚何半席之座咫尺之地汨其

志哉且鄉里上齒宗廟上爵朝廷上位皆有等威以明  
長幼故得彝倫敘而天下和平也且上自宰相御史大  
夫兩省五品已上供奉官自為一行十二衛大將軍次  
之三帥三公令僕少師保傅尚書左右丞侍郎自為  
一行九卿三監對之從古以然未嘗參錯至如節度軍  
將各有本班卿監有卿監之班將軍有將軍之位縱是  
開府特進並是勲官用蔭即有高卑會讌合依倫敘豈  
可裂冠毀冕反易彝倫貴者為賤所凌尊者為卑所

偏一至於此振古未聞如魚軍容階雖開府官郎監門  
將軍朝廷列位自有次敘但以功績既高恩澤莫二出  
入王命衆人不敢為比不可令居本位須別示有尊崇  
只可於宰相師保座南橫安一位如御史臺衆尊知雜  
事御史別置一榻使百寮共得瞻仰不亦可乎聖皇時  
開府高力士承恩傳宣亦只如此橫座亦不聞別有禮  
數亦何必令他失位如李輔國倚承恩澤徑居左右僕  
射及三公之上令天下疑怪乎古人云益者三友損者

三友願僕射與軍容為直諒之友不願僕射為軍容佞柔之友 又一昨裴僕射誤欲令左右丞勾當尚書當時輒有訓對僕射恃貴張目見尤介衆之中不欲顯過今者興道之會還爾遂非再謁入座尚書欲令便向下座州縣軍城之禮亦恐未然朝廷公讌之宜不應若此今既若此僕射意只應以為尚書之與僕射若州佐之與縣令乎若以尚書同於縣令則僕射見尚書令得如上佐事刺史乎益不然矣今既三廳齊列足明不同刺

史且尚書令與僕射同是二品只校上下之階六曹尚書並正三品又非隔品致敬之類尚書之事僕射禮數未敢有失僕射之顧尚書何乃欲同卑吏又據宋書百官志八座同是第三品隋及國家始升作二品高自標致誠則尊崇向下擠排無乃傷甚況再於公堂唱咄常伯當為令公初到不願紛披倴倴就命亦非理屈朝廷紀綱須共存立過爾隨壞亦恐及身明天子忽震電含怒責戮彝倫之人則僕射其將何辭以對

補遺

贊

李侍御寫真贊

前殿中侍御史正議大夫行洛陽縣令隴西李構年三十七

洛陽精堅強項稱賢粉續圖出風規宛然睟容昭寫卓立神全舉板迎揖吾將答焉

題名

華嶽廟題名

皇唐乾元元年歲次戊戌冬十月戊申真卿自蒲州刺史蒙恩除饒州刺史十有二日辛亥次于華陰與監察御史王延昌大理評事攝監察御史穆寧評事張澹華陰令劉嵩主簿鄭鎮同謁金天王之神祠

東林寺題名

唐永泰丙午歲真卿以罪佐吉州夏六月壬戌與殷亮

韋桓

桓舊集  
作桓非

尼賈鎰

鎰舊集  
作鎰非

同次于東林寺則同悟熙

怡二公惠秀正義二律師洎楊鷗存焉仰廬阜之鑪峰



想遠公之遺烈升神運殿禮僧伽衣觀生法師塵尾扇  
謝靈運翻涅槃經貝多梵夾忻慕之不足聊寫刻于李  
張二公耶舍禪師之碑側

西林寺題名

唐永泰丙午歲真卿以疎拙貶佐吉州夏六月癸亥與

殷亮韋桓尼

桓舊集  
作栢非

賈鎰

鎰舊集  
作鑑非

楊鵬憇于西林寺有

法真律師深究清淨毗尼之學即律祖師志恩之上足  
余內弟正義之阿闍黎也緬懷遠見二公之遺烈導余

躋重閣示余以張僧繇畫廬舍那佛像洎梁武帝戲線  
繡鉢袋因寓題歐陽公所撰永公碑陰

靖居寺題名

唐永泰二年真卿以罪佐吉州聞青原靖居寺有幽絕  
之致御史韓公涉刺史梁公乘嘗見招欲同遊而不果  
大厯二年十月壬寅評事韋甫已使將歸乃與別駕李

闕二字

清河房澄同官主簿陸涓甫男七步真卿子姪蔡

頤泚頤旰等同宿于下坊明日及僧明則智清而登禮

焉因覩行思天師經始雙泉之靈迹道契律師纂戎闕  
路之祕藏徘徊瞻仰乃援翰而勒于碑陰

題湖州碑陰

太保謝公東晉咸和中以吳興山水清遠求典此郡郡  
西至長城縣通水陸今尚稱謝公塘及遷去郡人用懷  
思刻石記功焉歷代至皇唐天寶末羣盜起公之碑誌  
失於所在眷求蕪沒深為愴然借舊史遺文敬刊息石  
公之雅量弘度蓋嗟嘆之不足



欽定四庫全書

顏魯公集  
卷十一

顏魯公集卷十一